



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

ig tiryimym@aolima

yt tir yimym

TAPAK 8

**Mallikarjun Kharge-i Amit Shah dangi Manipur atema shidi zulu**

**Australian Open: Sinner-i tebur kija asaya kokogo**



VOL. XXI ISSUE NO. 106 (ADOK 106) DIMAPUR

TENTONÜ (MONDAY)

ANJETI (JANUARY) 29, 2024

₹ 5.00

## May 2024 tashi nung Kohima tashi railway line atongtsü

**Guwahati, January 27, 2024 (Agencies):** Nagaland nung Dimapur-Kohima new Broad Gauge line connectivity project tembangba ya Northeast Frontier Railway (NF Railway) aser Indian Railways network ajanga inyaktetba mapa tulu ka lir.

Iba mapatong shilem tanabuba nung 1,319 meters tasazük Tunnel Number-4 yangluzükba ya kanga tongtipang kechiyong iba ajanga Kohima-i railway network ajanga linük den sendakteptsü.

April 2022 nungi tzunglu kanga aruba den ali majungba ajanga iba tunnel tupokba mapa nung tayongzükba aika ajurua liasü. Iba atema Geological Survey of India aser independent consultant teyari

agi. Ali telunglen tupoka aitsü atema New Austrian Tunneling Method (NATM) amshi aser tetsükdaktsütem liaka ita ka 41.25 meters tashi tupoka itet.

Tunnel Number 4 tupokba ajanga underground excavation nung 1,168 meters temogo aser May 2024 tashi nung iba mapa tembangtsü alizüing lir.

Dimapur-Kohima new Broad Gauge line project ya kilometre 82.5 tasazük lir aser iba nung Assam nung kilometre 2.75 aser Nagaland nung kilometres 79.75 dena lir.

Iba mapatong nung station tasen 8, apu aser road over bridges, road under bridges aser tunnels aika dena lir. Iba mapatong nung Rs 6,663 crore endoktsü ta asadangteta lir.

## ENNG-i NSCN/GPRN den lokteper

**Dimapur, January 28, 2024 (TYO):** Eastern Naga National Government (ENNG)-i National Socialist Council of Nagalim (NSCN) den loktepergo.

NSCN/GPRN aser parnok lenisüba nung temulung alemba ajanga iba lemtet ya agi ta ENNG President Tosham Mossang aser General Secretary Somai Pongha nati sangdong ka nung ashi.

ENNG-i NSCN den loktepbaji August 3, 2015 nü sign asüba Framework Agreement pusema nungitba ajanga lir. Iba tenangzükba ya Nagalim temetentem agizükba nung amendaka lir ta tenati ashi.

"Onoki iba framework nung ajemdaker Indo-Naga olemteper tashi itdaktsü. Onok loktepbaji ajanga Arunachal Pradesh nung

Tirap, Changlang aser Longding (TCL) nung alirtem ajungmesoba dang masü saka parnoki Naga national movement nung shilem agitsü ayongzüktsü" ta ENNG lennirtemi metetdaktsü.

Onoki TCL nung Pangmi region yimtenren tensa atema tebilemstü abener aser onok NSCN/GPRN den loktepbaji ajanga tashi itshisü. Pangmi region senzüka yutsüra iba ajanga Naga lima asoshi tetsükdaktsü ajurutsü ta tenatisa ashi.

Naga nung aser Naga tesemtem ajak ka akümtsü nungdaker. NSCN-i Naga flag aser Yehzabo atema noktakba ajanga onoki parnok den lokteptsü ajungmeso, ta Tosham Mossang aser Somai Pongha nati ashi.

## Manipur nung nisung 3 tepset

**Imphal, January 28, 2024 (Agencies):** Manipur nung tesüiba ghonda 24 tsüingda tatalokba balala nung nisung 3 asü ta Manipur Police-i metetdaktsü.

Ninthoukhong Ward nung arishi küm 40 tain Village Volunteer Wareppam Kiran indang tasü mang angu.

Honibar nikongdang 3:00 ako meta Ningthoukhong yimtsüing anasa aliba Churachandpur district tenemlen nungi telungpurtemi bomb poklokja aser injang khaloktsü dang Kiran ya bunker ka nung lia tepset.

Bomb aser injang amshia amakba ajanga Kiran atsüka aliba bunker chirep aser iba telung nung pa tasü mang angu.

RIMS mortuary nung post-mortem atema yua lir.

Ano, Honibar anepdang 5:30 ako meta Imphal East aser Kangpokpi district tsüingda Satang Khul nung telungpurtem aser Village Volunteers khatap.

Iba mapang Kangpokpi district kübok Ng Phainom nung Timminlun Khongsai (26) khaset.

Maneni, Meira Paibi Lairenlakpam Bimola (50) gari lendong ka nung asü.

Bimola ya Kangla Siphai kinungtsü liasü aser Honibar nikongdang 3:30 ako meta Tejpur Waiton Lamkhai nung gari lendong nung tsükset.

Lai Village Volunteers yaritsü atema iba tesemi aodang lendong atalok.

## PM Modi-i Nitish Kumar nem tenüngsang agütsü



January 28, 2024 nü Raj Bhavan, Patna nung Nitish Kumar-i Bihar Chief Minister inyakttsü tezüngzükteper agiba angur.

**New Delhi, January 28, 2024 (Agencies):** Deobarnü Nitish Kumar-i Bihar nung 'Mahagathbandhan' telokteper toktsür BJP den sorkar tasen ka akümtsü kuli agütsü.

Tanü Nitish Kumar-i tang agi tugubenbuba chief minister inyakttsü tezüngzükteper agiba sülen Prime Minister Narendra Modi-i BJP-i aniba NDA sorkar tasen nem tenüngsang agütsü.

"Onoki Bihar renloka odaktsü atema akokba tashi mapa inyakttsü aser sorkar tasenba dak tamang akar" ta Modi-i ashi.

"Bihar nung akümba NDA sorkari state renlok daktsü aser nübertemi aginübatem inyakttsü. Ni chief minister Nitish Kumar aser deputy chief minister tem-Samrat Chaudhary o Vijay Sinha nung nem tenüngsang agütsü. Parnoki Bihar nung nübertem bendanga agüja tajungtiba nung tenzüktsü tamang akar" ta PM Modi-i ashi.

Bihar yimtenren nung kechi ataloktsü ta anogo ishika jembia aruba sülen Deobarnü JD(U) president Nitish Kumar-i 'Mahagathbandhan' telokteper toktsü. Pai Lalu Prasad Yadav'er Rashtriya Janata Dal (RJD) den tesentakteper pilaba sülen Bihar nung BJP den sorkar tasen ka akümtsü kuli agütsü.

Deobar nikongdang 5:00 ako meta Nitish den deputy chief minister anati Raj Bhawan nung tezüngzükteper agia liasü.

Iba sentong nungsa cabinet minister 6- Vijay Kumar Chaudhary JD(U), Bijendra Prasad Yadav JD(U), Dr Prem Kumar BJP, Hindustani Awam Morcha (Secular) president Dr Santosh Kumar Suman, Shrawan Kumar JD(U) aser Independent MLA Sumit Kumar Singh nungeri tezüngzükteper agiogo.

'Mahagathbandhan' aser INDIA bloc nung pa asoshi inyakyim shitak maliasü ta tanü

Nitish Kumar-i ashi.

BJP den tokteptsü INDIA telokteper teinyakttsü shitak meinyak, ta pai ashi.

"Ni tanü Chief Minister menden toktsüogo aser iba sorkar anenjang ta Governor dang shiogo. Party lennirtemi kü nem shisatsü agüja aru. Parnoki ashiba ni anga menden toktsü. Tensa majung liasü anungji onoki tesentakteper pilaogo" ta tanü Nitish-i CM menden nungi anenba shidi agütsüba sülen osangbener dang ashi.

Arishi küm 72 tain Nitish-i küm 10 tan agi pungubenbuba telok ka toktsür ka melenogo. Iba ajanga nisungtemi pa dang "Paltu Kumar" ta ajar.

2022 nung Nitish-i BJP den tesentakteper pilaa liasü. Maharashtra nung BJP-i Shiv Sena den inyakba ama par Janata Dal United (JD-U) nunga inyakttsü akok ta tebilemstü aliba agi pai iba lemtet agia liasü.

## Tanü nungi Guwahati nung BATIC tenzükter

**Guwahati, January 28, 2024 (Agencies):** Linük 24 nungi teshimtet nübo 400 temai Bi-Centenary Assam Tea International Conference (BATIC2024) nung adentsü imlar.

Iba sentong ya Tea Board of India, Tea Research Association (TRA) aser Department of Commerce and Industries, Assam ajanga Hotel Radisson Blu, Guwahati nung ayongzükba amongtsü.

Hombar nikongdang 4:00 ako nung Assam Industries Minister Bimal Bora-i mungdang lapoktsütsü.

Iba mungdang nung Australia, Bangladesh, Canada, Iran, Malawi, United Kingdom, USA, Italy, Ireland, Morocco, Mauritius, Tunisia, Germany, China, Japan, Sri

Lanka, South Korea, Indonesia, Tanzania, Rwanda, Uganda aser Kenya linüktem nungi teshimtet nübotem adentsü.

Assam süngo küm noklang ana ajungba tenüng nung iba mungdang ayongzükter. BATIC 2024 ta ajaba mungdang ajanga Assam nung süngolu tila ayimertemi temelenshi tulu bentsür aruba sayutsü. Iba sentong nungsa climate change/sustainability, new technology aser innovation tebilembatem lemsateptsü" ta Tea Board executive director Arunima Phukan Yadav-i ashi.

"BATIC 2024 nung Australia aser New Zealand dangi Assam tea exports maparen nung temulung agütsütsü aser Gen Z o Gen Alpha ajanga süngo angatetba indang lemsateptsü.

Maneni Artificial Intelligence aser Machine Learning amshia tea plantations tajungba akümtsü asoshi shisalemsateptsü" ta Yadav-isa ashi.

BATIC 2024 nung tongti o jembirtemji Brand Guru Harish Bijoor, Chaayos Founder Nitin Saluja, Wanlin Tea Shanghai nungi James Grayl, FAO Rome nungi Daneswar Poonyth, Boomitra Founder Ganesh Babu, Tea Association of Canada President Shabnam Weber, Australian Tea Association Chair Sharyn Johnston, TCS nungi Dr Sanat Sarangi aser South Korea nungi Troy Kim o Thomas Kim na lir.

BATIC 2024 agiba sülen January 31 nungi February 2 tashi FAO Intergovernmental Group on Tea indang 25th session agitsü.

### Low Cost / No Cost Teaching Aids dak sendakba nung training agi



**Dimapur, Aenjeti/January 28 (TYO):** Low Cost / No Cost Teaching Aids dak sendakba nung training den repsema Workshop ka January 27 nü Breeze Women Welfare Association (BWWA), Nagaland-i ayongzüka Livingstone Foundation International, Dimapur nung agiogo.

Iba training ya Nagaland kübok district balala nung agia aliba training sentong nung shilem ka lir.

Low cost / no cost teaching aids dak sendakba nung training ya tir Ani Yephthomi lenisüba nung BWWA indang sentong ka lir, koba jenjang dalang teaching-learning aid tem amshia sayutsü aser angazüksü atema tesayur aser kaketshirtem ajungmesotsü atema lir.

Iba sentong ya National Council for Science & Technology Communication (NCSTC), Department of Science & Technology,

Government of India-i nongita yaridar aser Kaziranga University, Jorhat aser ThinkTac, Bangalore na den longjemer inyakdar.

Livingstone Foundation International nung training sentong ya sessions asem küma lemsar agi, kong St. Paul Hr. Sec. School, Lewis Academy, Spring Blossoms Academy aser host school, Livingstone Foundation International nungi tesayur aser kaketshirtemi shilem agia liasü.

Sentong nung o jembiba mapang Livingstone Foundation International mendenbuba Dr. Andrew Ahoto Sema-i, kaketshirtem dang melenshia aoba lima den peta aintsü aser parnok sempettem arantetshia takokba tashi mapa aika angazüksü ajungshi, ajita asünungdang tetoktepba nung shinga tesülen metoktsütsü, ta ashi.

Paisa, mark aser grade agütsüba inyakyim melenshiogo anungji tanü education system

ya tanur ka lenla ajak nung terenlok asoshi asütsüla aser tanurtem Intelligence Quotient (IQ) dang masü saka Social Quotient (SQ), Emotional Quotient (EQ) and Adversity Quotient (AQ) ajungketsü atema sayutsüla, ta ashi.

Kaziranga University Dean, Bobby Roy aser Manager, Abhijeet Bharadwajna lenisüba nung Student Development Session agiba mapang KU nungi kaketshirtemi Artificial Intelligence (AI) dak sendakba nung terenlok tasen aser jangratemtsütem saya liasü, kong Virtual Reality (VR), Augmented Reality (AR), Mixed Reality (MR) aser Robotics nung densema liasü.

Training nungsa Low Cost / No Cost Teaching Methodology indang Bipul Sangma, Nabi Hassan aser Bobby Bol Zeliang nungeri tangazükba agütsü aser Low Cost Learning Aids indang Workshop ka Regional Manager, ThinkTac, Bangalore Pritom Routh-i agüja liasü.

### NE nung azütokshi lendong tajemba kümogo: CM Pema Khandu

**Itanagar, Aenjeti/January 28 (Agencies):** Northeast nung taoba küm teku tsüngda azütokshi lendong tajemba kümogo.

Iba olen ya Arunachal Pradesh chief minister Pema Khandu-i lemsatepa liasü.

Arunachal Pradesh CM Pema Khandu-i ashiba agi, 2014 nungi 2023 küm tsüngda North East nung azütokshi lendong shilem 73 agi tajemba kümogo.

Temetetsü kaji Narendra Modi-i aniba BJP orkari 2014 küm Centre nung sorkar kümtet aser iba sülen 2019 election nunga

parnoki takok ngua sorkar kümteta liasü.

"Northeast nung sentoka toktsüba aser azütokshi agi sünga aliba putu süitemogo," ta Arunachal Pradesh CM Pema Khandu-i ashi.

Pai ashiba agi, "North East nung 2014 küm nungi 2023 küm tashi nung azütokshi lendong shilem 73 agi tajemba kümogo."

"Yimjung nung aliba ajanga iba tesem tarutsü tajungba ka asoshi lenmang sadema lapoktsüogo," ta Arunachal Pradesh CM-isa shisem.

### Noksen nung Development of Pilgrimage Facilitation semzükogo



**Kohima, Aenjeti/January 28 (TYO):** Prashad Scheme 2019-20 kübok Noksen yimtsüng nung Development of Pilgrimage Facilitation, January 27 nü Director, Tourism, Nagaland Keduosie-u Metha-i semzüksüogo.

Iba sentong ya Sr. Tourist Officer, Tuensang Moatemsu Sangtam lenisüba nung agia

liasü. Sentong nung Noksen Baptist Church Pastor Dr. Alen-i bendanga agütsü sarasadem agi, Executive Engineer Tourism Er Vizotuo Seletsu-i Technical Report agütsü aser Noksen Village Council chairman Yongkong Chingmak-i tepela o jembia liasü.

### Taoba Assam Youth Congress lenir Angkita BJP nung denogo

**Guwahati, Aenjeti/January 28 (Agencies):** Lok Sabha elections agitsü lia Assam nung Bharatiya Janata Party (BJP)-i Deobarnü tongtibang lenir kar party-i pelashishia agizükogo.

Taoba Congress MLA Bismita Gogoi, taoba All Assam Students' Union (AASU) tir Dipanka Kumar Nath aser taoba Assam Youth Congress tir, Angkita Dutta nung BJP nung BJP nung officially denogo.

Bismita Gogoi-i BJP nung denli la taoba mapang inyaka aliba party (Congress) lenirtem aitsü aser ashiba agi, Congress pur tang ama dang süra taruba küm 100 nunga kodanga tashi dangi marutsü.

Laisa, party yongtsü nung mesenmetui amshiba indang

lemsatep aser Dutta nem ochi obendang magütsüba aser la tekelok shisatsü mesüngjemteti toktsüba atema parnok aija liasü.

Kasa mapang nung Dipanka Nath-i, pa AASU nung inyakba mapang kaketshirtemi akhangba aika atalokba indang lemsatepa liasü.

Paisa, BJP puri ochishia inyaktsüba, merit dak ajemdaker mapa agütsüba indang tenüngsanga jembi aser Congress puri taoba mapang sen atema mapa ayokba aija liasü.

Dutta-isa, Rahul Gandhi-i aniba Congress party indang jembiba mapang, la ita ter tashi ataka Bharat Jodo Yatra mapang la indang tebilemstü kecha mebenettsüba atema sasa bilemba lemsatep.

### Assam Rifles-i sentong balala ayongzüka agi



**Dimapur, Aenjeti/January 28 (TYO):** Assam Rifles-i ayongzüka Peren District nung 75buba Republic Day mungogo. Assam Rifles-i ayongzüka sentong nung wako atsüketba sentong, local tem den sensaksemba sentong aser tanurtem aser yimdaklirtem nem nanglong lemstüba sentong densema liasü.

Iba sentong nung 45 Assam Rifles sepaitem aser local ketdangsürtem aser yimtsüng lenirtem densema yimdaklir 122-i shilem agia liasü. Wako atsüketba sentong agiba sülen Peren aser Jalukie nung alirtem den sensaksem sentong tajungka agia liasü.

January 26 nüsa Assam Rifles-i ayongzüka Railway Higher Secondary School, Dimapur nung Republic Day sentong ayongzüka agiogo. Sentongtem rongnung wako

atsüketba sentong aser Railway Higher Secondary School Dimapur nungi tesayur aser kaketshirtem den sensaksem sentong ayongzüka agiba densema liasü.

Iba sentong nung kaketshir 50 aser tesayur 8-i shilem agia liasü. Assam Rifles-i sentong tajung ayongzüka katsüba atema AR dang kanga pelaba lemsatepa liasü.

Kasa mapang nung 'Illuminating Lives' sentong kübok Schneider Electric Foundation India aser Sunbird Trust den longjemer Assam Rifles puri Republic day nü Chingnyu yimtsüng nung alir 118 nem solar light aser Dan yimtsüng nung alirtem nem light 175 agütsüogo.

CSR kübok iba sentong ya yimtsüng nung alirtem taküm libaliro jenjang ajungketsütsü nükjidong ayongzüka agidar.

Jenjang tajung aser high-performance light tem yagi Nagaland kübok kinük nung aliba yimtsüng nung alirtem anogoshia inyakyim aser tanurtem kaket shisatsü bushiba nung teyari agütsütsü.

Maneni January 26 nü Assam Rifles-i Unit War Memorial, Ghaspani nung asür Rifleman Jeewan Singh nem tetushi agütsüba sentong k ayongzüka agiogo. 2003 küm January 26 nü Changlang, Arunachal Pradesh nung duty mapang Jeewan-i linük asoshi pa taküm bendanga agüja liasü.

Iba sentong nung office 5, JCO 19 aser Battalion nung tanga rank nung alir 238-i shilem agia liasü, kong Jeewan-i kanga tasü ita pa taküm bendanga agütsüba indang tatsü agi metetdakja liasü. Pa tasü aitba aser bendanga agüja inyakba ajanga sepaitem ajak ajungmesotsü.



So-Li-Sü Theatre-i parnok indang jilushi "Sügra" ta sür ka January 27, 2024 aonung Ungma yimdak Yimtsüngta Arok Sabang nung sayuba mapang tangokba noksa nung angur. Iba jilushi ya Aor tar nung ertsü dak ajemdaker yangluba ka lir.

## Nitish Kumar-i INDIA telokteptoktsür BJP den longjemogo



January 28, 2024 nü Patna nung JD(U) tongti Nitish Kumar den BJP National General Secretary Vinod Tawde, Bihar BJP Tir Samrat Choudhary, BJP lenir Vijay Kumar Sinha aser tangartemi Raj Bhavan nung Bihar Angh, Rajendra Arlekar ajurua sorkar akümtsü asüngdangba mapang tangokba noksa nung angur.

**Patna, Aenjeti/January 28 (Agencies):** Amongnü Nitish Kumar-i Bihar nung Chief Minister inyaksü atema tang agi tekubenbuba tenangzükba agiogo.

Lok Sabha election nung BJP-i aniba NDA sorkar anema tokteptsü atema Nitish Kumar-i ayongmesoa opposition INDIA teloktep tenteta liasü, ajisüaka pai INDIA teloktep toktsür National Democratic Alliance (NDA) nung denogo.

Amongnü anepdang Nitish Kumar-i Bihar nung teloktep sorkar nungi chief minister menden nungi anen aser nikongdang Chief Minister tenangzükba agia BJP den longjemer sorkar tasen kümogo. Iba sentong nungji BJP lenirtem aser NDA teloktep nungi lenirtem aden.

2022 küm Nitish Kumar-i NDA toktsüba sülen Rashtriya Janata Dal (RJD) aser Congress den lokteper sorkar aküm, ajisüaka ita 18 shi lir pai maneni NDA dangi meyipogo.

RJD lenir, Tejashwi Yadav nem ochimashi tai tonglokja lir, ibayongji Kumar-i RJD aser Congress den tesendaktep raksatsü telemtetba agi, ta osang angazükber.

Bihar sorkar tasenba nung BJP lenir Samrat Choudhary-i minister tenangzükba agiogo. Arrshi küm 54, Samrat Choudhary-i yaküm March 27 nungi Bihar BJP Tir inyaker. Küm trok tejaklen pai BJP nung adenba sülen pa Bihar state assembly nunga Opposition lenir liasü.

Amongnü anepdang Bihar chief minister Nitish Kumar-i state Angh, Rajendra V Arlekar nem CM menden nungi anenba shidi agüja liasü.

Anepdang Angh ajuruba sülen osangbenertem den jembidang pai, "Ni Chief Minister menden nungi anenogo aser Angh dang sorkar anenjang ta asüngdanga liasü," ta metetdaksü.

2020 küm Bihar state assembly elections nung pai BJP den lokteper toktepa takok angu, ajisüaka 2022 küm pai BJP den teloktep raksaa liasü.

Osang angazükba agi, Centre nung BJP lenirtemi Nitish Kumar-i aniba JD(U) den longjemtsü melungaka state nung BJP lenirtemibo memelungi liasü.

Centre nung BJP lenirtemi taruba Lok Sabha election nung Bihar nungi menden aika nung takok angutsü nükjidong nung Nitish Kumar den longjemer.

2014 küm Lok Sabha elections nung JDU-i Bihar nung tangar den meloktepi toktepyonga vote shilem 15.8 nguteta liasü aser 2019 küm Lok Sabha election nunga vote shilem 21.81 angu, ajisüaka vote shilem 6 bo Modi ajanga anguba liasü ta züngshir.

Bihar yimtiba, Patna nung journalist, Chandan-i, "Centre nung BJP lenirtemi 2024 general elections atema tongtibangüsü bilemer. Nitish indang vote ajanga BJP-i state nung menden aika nung takok angutsü, ta parnoki (BJP) meteta lir. Ibayongji state nung

lenirtemi memelungaka parnoki pa den tezüngzüktepi agiogo," ta metetdaksü.

Yimtenren tsütsü mongin, Mahendra Suman-i, "Iba ya INDIA teloktep atema tejakshitsüka asütsü, kechiyong BJP-i INDIA teloktep tentetba nung tongti shilem agisang (Kumar) tangbo BJP den lir, ta advertise asütsü. Nitish Kumar-i iba telemtetba agiba ajanga INDIA teloktep nung aliba party tem temelung ilatsü," ta metetdaksü.

"Iba ya ajanga BJP-i lung ka agi ozü ana onsetogo," ta Suman-isa ashi.

Osangbener den jembidang JDU lenir kati, "Mamata Banerjee (Bengal CM), Arvind Kejriwal (Delhi CM) aser INDIA teloktep nung aliba lenirtem

Congress inyaksangshi ajanga mepelar, anungji ibaji ajanga 2024 general elections atema teloktep jenjang raksatsü.

INDIA teloktepi junga meinyaktetra ibaji ajanga 2025 küm Bihar assembly elections nunga kongshitsü, anungji onoki iba timtemji maginü liasü," ta metetdaksü.

Paisa, "Ano külen, INDIA teloktep tentettsü atema Nitish Kumar-i meranga inyakyonga pai kecha majangzüktepi, anungji iba teloktep nung aliba tetezü kecha maliasü," ta metetdaksü.

Osang angazükba agi, Nitish Kumar-i BJP den lokteptsü telemtetba agiba ya ajungbena masü, saka tesüba ita trok tashi jembia aruba sülen iba telemtetba agiba lir.

## Tanü latetba ozüngtem ajanga asüng India tashi itshitsü: PM Modi

**New Delhi, Aenjeti/January 28 (Agencies):** Amongnü Ato kilonser, Narendra Modi-i, tensa mapang apir sorkari ozüngtem tajungba küma yanglur; item ozüing latetba ajanga asüng India tashi tali itshitsü, ta metetdaksü.

Supreme Court küm 75 ajungba sentong nung jembidang Modi-i, criminal justice ozüing tasen asem yangluba ajanga India nung legal, police inyaksangshi aser bushisüngdangba inyakyimtem putu tasen ka nung ajemogo, ta ashi.

Ato kilonser, "Küm noklang aika tejaklen aliba ozüngtem ozüing tasentem agi jungjunga melena benoktettsüji tongtibang. Iba dak sendakba nung onoki sorkar mapa inyakerem atema training aser capacity building mapa tenzükogo," ta metetdaksü.

Modi-isa Supreme Court dang tanga stakeholders atema capacity building asoshi inyaksü ayongzük.

"Judicial system nem tashi agütsüba 'Bharat tejakleni aoba' shilem ka lir. Temelung lemtettsüa judicial system alitsü asoshi sorkari maneni inyaka telemtetba aika agidar. Iba dak sendakba nung Jan Vishwas Bill-a agizükogo. Tarutsü nung iba ya ajanga judicial system khuret kanga

pungbatsü," ta paisa metetdaksü.

Ato kilonseri, Supreme Court-i India nung democracy tashi itdakttsüba den nija temeden dak sendakba tongtibang obendang aika agütsüogo, aser itemji ajanga linük nung loktiliba-yimtenren atema lenmang tasen sayuogo, ta ashi.

"Tanü India nung rongsenketzung mapatongtem ajanga tarutsü India ajungtsü atema tamendakdak yanglutsü. Tanü India nung yangluba ozüngtem ajanga asüng India ajungtsü atema maneni tashi itdakttsü," ta pai ashi.

"Tang alima nung temelenshi kanga adokba mapang nung alimai India dak rangloker, kechiyong alima tamang India nung tashi taitba akümer. Iba ama mapang ka nung India-i ngutetba maongka ajak agütsüla," ta paisa ayongzük.

Paisa, Supreme Court building ulushia yanglutsü atema taoba hopta sorkari sen crore 800 lemezüktsüogo, ta metetdaksü.

Iba sentong nung Chief Justice of India, D Y Chandrachud den Supreme Court nung judge tem, law officers aser Law Minister Arjun Ram Meghwal nungera aden.



January 28, 2024 nü Gulf of Aden nung Indian Navy sepaitemi MV Marlin Luanda rong nung mi enseptsü merandang tangokba noksa nung angur.

## AIMPLB-i ASI indang report ashishir

**Lucknow, January 28 (Agencies):** All India Muslim Personal Law Board (AIMPLB)-i Archaeological Survey of India (ASI)-i tawa sangdongba report ashishiogo.

Varanasi nung aliba Gyanvapi mosque nung ASI-i bushisüngdangba sülen iba report ji district court nem agüja lir. Iba report nungji Gyanvapi mosque aliba tesem nung akhidang Hindu nung tekülem ki ka aliba kuli bushitetogo, ta shia lir.

AIMPLB executive züngsem, Qasim Rasool Ilyas-i sangdong ka ajanga, "ASI indang report nung aliba kulitemji tatembang masü. Yamai inyakba ajanga opposition party-i loktiliba nung mepetmesü aser security maliba melungsentsü aita dakttsüogo," ta ashi.

Ilyas-isa, ASI indang report media nem agütsüba ajanga Hindu teloki court mezüngmeshiogo, ta aitsü.

"Gyanvapi Masjid dak sendakba nung Hindu

organizations-i küm aika nüburttem nem osang tai agüja aruogo. Tatishitsü tasentibaji Archaeological Survey of India-i court nem agütsüba report ya lir. Iba report ya asadangtsü atema dang liasü saka parnoki osangkakettem nung adokdakttsüogo. Opposition party-i court mezüngmeshiba dang masü saka linük nung tongmelang nüburttem nem osang tai agütsütsü merangogo," ta paisa metetdaksü.

Anogo ka tejaklen ASI report nung ajemdaker Hindu nung atema ken o jembitsür lawyer Vishnu Shankar Jain-i, Aso 17buba mapang nung Hindu nung tekülem ki ka bensatsüba sülen kasa tesem nungji Gyanvapi mosque asü, ta asütsüba kuli lir, ta metetdakja liasü.

Hindu aser Muslim nung telok napronglai ASI survey report parnok nem agüjang ta mepishia liasü, ajioda Bodhbarnü Varanasi court-i ASI report ji telok anaprongla nung lawyers nem agüjang, ta tuyu.



January 28, 2024 nü Virginia nung India nung Republic Day sentong ka nung India Ambassador to US, Taranjit Singh Sandhu aser Virginia Lt. Governor Winsome Sears na den tangartem tangokba noksa nung angur.



## TIR YIMYIM YIMOBILEM (EDITORIAL)

DIMAPUR TENTONÜ, JANUARY (AENJETI) 29, 2024

### Nakmati lendong

**Y**akanü Wokha district nung Ranchyan nung lushi nung ali mijang (nakmati) atudak mi lendong ataloka yangji mapa inyaker trok rongsetba lendongji asenok ajak atema arsanoktsüba osang ka amai asütsü. Asenok Naga nungertem nem Tsüngremi Naga lima nung ali rongsen jenti aremoka lir, anungji itemji asenoki tagitet shia agiteta temoatsü tulu küma amshitsübaji kanga tenügdaktsü. Ajisüaka, asenoki Tsüngremi moatsüba rongsen aser taküm ser nung mashilen nungi tim mesüi amshitsü merangdang lendong timtem aser takoksa ajurur. Aji oda, temoatsü agi lendong küma inyaktetba mapatem rongnung tang nakmati atuba lendong nung asür aser yirurtemji dang masü saka nakmati atuba mapa nung kiburtem aser nübortem asoshiang lendong tuluba ajurutsü. Atangji, asen lima nung dang masü saka alima nung nakmati atudak tesem aika nung ongken anembangba lendong ajuruba osang aiben angashir. Ajisüaka, itemjibo machine shitak amshia ali tupoka aoba den külemi ali tangita ki süyonga aoer aser electric light dena enoka ali telonglenji nakmati tuyonga aier. Anungji, lendong atalokyonga jet ta ali telonglen nembangba aliba nisungtemji ali yadoker kümzüksü meranger. Item denji asenok nakmati atuba mapatem reprangdangra, asenokbo tazü aser nakmati bushir masü lendong bushia ali telongi aiba den kasa lir. Atangji, asenoka ali telong nung aliba mijangji agiteter sen küma amshitsü asoshi inyakyim asütsüsa Geology & Mining Department-i Nagaland Coal Policy (Amendment) 2014 lateta lir. Iba inyakyim ajanga Nagaland nung kongsa ali telong nungi mijang tuteta yoknudir, iba department dang nungi temelaba agitsü aser department-i repranga mijang atuba mapaji inyadaktütsü aser department-i tone shia alimelen sen Rs.290 agitsü. Item maparentemji shitak mita inyadaktütsü atema department-i check gate nung Nagaland nungi nakmati bener aoba garitem mita anüksü. Ano, inyakyim latettsüba tajung kaji, mijang aturtemi parnok mijang atuba mapa matemdangsa parnoki ali tusaba ajak tanaben ali tasen bener arua akhi ama yangji süngdonglidong meitsüsa nembangba toktsütsü. Item ajakji shitak repranga inyadaktütsü asoshi iba Nagaland Coal Policy (Amendment) 2014 ajanga yimtak putu menden nema tashi agüja lir, anungji pei lushi nung mijang atuba ajanga tzü mopong, ali aser ayong dena tagi majung meraksadaktütsüsa mita reprangtsübaji yimtsüng shia nung yimten mapa asütsü. Item lateta aliba inyakyimtem den tang asen lima tesem balala nung nakmati atuba inyakyimtem ya medemdangra, asen lima nungbo Government Coal Policy-a kecha lateta maka ama inyaktepba asenoki angur. Aji oda, tang Wokha district nung atalokba lendongjia tapi agidang koya longpok tupokyonga aier amai dang aiba mapang ajungben ali telonglen nungi mi adok asütsüa akok. Iba ama lendongji ka majuruyonga, süng mashi kati azüklen ali tangita yur ali telong tupoka aidangji ajungbena aliji alua nembangtsü. Ano, item dang nungi lendong tulubaji asenok yim ajak tenem kolak nung dang küma lir aser tenem tsünglen nakmati tuyonga aibaji anenzüka alur yimji dena meküpzüka alutsü ana nung lir. Aji oda, tanga nakmati atudak tesem aika nung aluyim majung kümdagi aser ayong nung taküm sangnu kecha melitettsüsa kümogo. Ibaji nakmati atur kija tai masü saka yimtsüng nung putu menden aser government na pronglai asüng indang mebilemi tanü lateta akaba ozüng mereprang ser tenük amur inyadaktütsüba ajanga asütsü. Nakmati atuba mapa ya miima inyaktettsüba mapa ka masü aser nakmati ya drugs abenba amai miima bener check gate ajanga senzütsüba mapa ka masü, anungji Nagaland nung nakmati atuba mapatem ya ozüngi memelaba mapa inyaker süra government-iang ozüngi memelaba mapaji inyadaktütsür asütsü.

## OLEMSABANG

### Sen aser rongsen kisung agi nisung taküm malir

~ L. Kika Pongener.


Alima nung mimchir taküm aliba ya sen aser rongsen agi taküm ya alir masü, saka Tsüngremi apuoktsüba taküm tangola agi taküm ya alir. Tsüngrem oi ashir, "Nisungi am tesa agi dangbo taküm malitsü, saka Tsüngrem bang nungi adokba o shia agi alitsü" (Mathi-4:4). Yisu alima nung alidang, Pa tzü nung Baptir lia, temenen tanelai atitangtsü asoshi pa azüngmeyakdak lisem limai anir ao. Pa anogo lirnu aser lir aonung lumiseta lir külen, temenen tanelai Yisu dangi arur ashi, 'Na Tsüngrem chir sura, item lung agi amtsük kümang ta shiang'... ta atitang. Saka Yisu-i langzü, 'Nisungi am tesa agi dangbo taküm malitsü, saka Tsüngrem bang nungi adokba o shia agi alitsü'. Iba putu mapang tanü amai sen amshiba mapang ka masü, ajioda, parnok taküm alitsü atema amtsükji kanga tongtipang liasü sudi. Yongji temenen tanela jagi lung agi amtsük kümdakjang ta ashi. Ashiko, tanü putu nung asübo, 'Item lung yagi 'SEN' kümdakjang ta shila'...Aser Yisu-ia 'Nisung sen agi dangbo taküm malir'...ta langzüla...ta asenoki shisadanger. Atangji, Yisu-i inyakdi sura, lung agi amtsük kümdaktsütsü atema pa tsüngdang aji kecha tasak masü, saka mojing sentong nung pai ashiba anga-a aji inyaktütsüba Yisu-i khenyongi memulung. Atangji, Yisu-i ashiba ama alima nung nisung ya amtsük aser chiyungtsü kisung agi taküm alir masü. Ajioda, chiyungtsü tepok sunga chiyunger, temang tenuktelen ajunga nung tashitak kecha mali tashi-ita aliba ya, Tsüngremi taküm agutsüyong taküm alirba dang. Ajisüaka, Tsüngremi asenok dak nungi tangola ya agienadokra, iba second-minute nungji asenok takümji tatempang asütsü. Anungji asenoki asen akaba rongsen dak temulong lema melili, kechiyong asenok ya rongsen kisung agi taküm ya alir masüa ta angateta asenoki tamasa Tsüngrem bushidi.

Alima ya tazüngla dang aliba Tsüngremi o ka dang ashiba agi, anung aser alima ajunga ya poktetdaktsü. "Tetenzük nung o liasü, o Tsüngrem den liasü, aser o-ji Tsüngrem liasü. Tetenzük nung pa Tsüngrem den liasü; Kechisarena Pa ajanga adok" (Yoh-1:1-2) Asenok ya Tsüngrem bang nungi adokba o ka agi taküm alirba dang, Tsüngremi asenok taküm tangola agienadokra, iba second-minute nungji asenok arakzüba ya anenadoktsü. Asenoki kanga tuluka amai bilemyongjia asenok takümji naro ka tanep tobur junga punga aliba nikongdangbo azüla-a aoba ama, aser aküm (Shadow) ka amai jena oadoktsü. "Tetsüri asoba nisung arishi tatsü, naro ka ama apunger aser azüla-a oadoker; Ano aküm ka ama ajener aser meli-i akümer" (Yob-14:1). Asen arishi anogo ya sutaker suksen ka dang nungi tekaraba aor aser teimla mekai akümer. "Kü anogo sutaker suksen dang nungi tekaraba aor aser teimla mekai akümer" (Yob-7:6). Temenen tanelai Yisu atitangba ama, anogo shia iba kasa ola jagi asenoka atitanger. Temalen shisemba ama, Yisu alima nung aliba mapang nisung taküm alitsü asoshi amtsükji kanga tongtipang liasü. Aji oda, temenen tanelai Yisu atidangba ama, tang ya asenoka atidang ka asünung, "Item lung yagi 'Sen' kümdakjang ta shila". Mesura yimer rongsen, arogo rongsen, lokti rongsen ya ne meyong kümer agiang...ta anogo shia atidangdagi...Asenoki iba tatidangji akoker asü makoker ..???

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Esperanza CDMX Festival atema Mexico City nung Arogo 2000 longjemmer



Yaküm Mexico City nung Esperanza CDMX Festival nung sayutsüngir, Franklin Graham-i jembidang tangokba noksa nung angur.

**January 28, 2024:** Mexico City nung Khrista osangtajung proktsü atema sayutsüngir, Franklin Graham indang Esperanza CDMX Festival asoshi yimti nung aliba Arogo 2,000 dak tema longjemogo, ta osang ka ajanga metetdaksü.

Yaküm iba sentong nung nisung 52,000 dak tema dena kanga takok ngua liasü. Taküma kasa sentong ya February 17-18 anogotem nung agitsü.

Billy Graham Evangelistic Association (BGEA) nung Tir aser CEO, Franklin Graham-i maneni iba yimti semdanga Khrista dak teimla osang sangdongtsü atema yongyar, ta lemsatepogo.

Graham-i, nisung aikati timtem khuret balala ajurur, saka Tsüngremer sentong ka lir aser nisung shia atema Tsüngrem sentong balala lir, ta ashi.

Tang Mexico nung rara aser ozüing alema inyakba mapatem dak sendakba tayongzükba jenti lir. Mexico nung tetsürtem aser osangbenertem densema nütsüing kar anema inyakba kanga bulua ataloker; iba ya

linük nung tebilemtsü onük tuluka kümogo.

Mexico nungsa ochimashi jenti aliba aser rejutem jenjang tamajungba akümba ajanga nüburtem okronga timtemer.

Franklin Graham-i sangdong ka ajanga, "Teimla osang sangdongtsü atema ni tanaben Mexico City-i aotsü yongyar. Nisung aika taküm nung timtem jenti lir. Asen meketa timtem aika lir, saka iba yimti nung alirtem dang Tsüngrem parnok den lir aser asenok nisung shia atema Tsüngrem sentong kaka lir, ta ni parnok den lemsateptsü," ta metetdaksü.

BGEA-i ayongzükba Esperanza CDMX Festival ji Palacio de los Deportes (Sports Palace) nung agitsü aser kasa sentong nungji osangtajung kentenerem aikati shilem agitsü.

Yimti nung bus 750 dak temai yimti tesem balala nungi nisungtem sentong agiba tesem jagi anir aotsü.

Tang iba linük nung Santa Muerte [Temeshi Tasüba] telok kanga nungtugu kümdar, ajisüaka yangji aliba Khristan

lenirtemi mission mapa maneni inyaker. Khristan lenirtemi Mexico City ya Khrista osangtajung proktsü atema maongka tajung aliba tesem lir ta bilemer.

Centro Familiar Cristiano de Mexico nung pastor, Benjamin Rivera-i, "Mexico City ya nütsüing jenti aliba yimti ka lir. Iba yimti meketa aliba municipalities-a ajak züngzokra nütsüing million 26 nungi million 28 shi lir," ta metetdaksü.

Pastor Rivera-i, Mexico City nung südoksünema kazütsü atema tesem balala aika lir aser ibaji ajanga nisung aika tanela nung mainer, ta metetdaksü.

Iba yimti nung nisung aikati temenen tanela nungi teyari bushir, aser iba ya region nung kanga nungtugu kümdar, ta pastor-isa metetdaksü.

Yaküm Esperanza CDMX Festival agiba ajanga nisung aika kongshia Arogo aika nung züngsem anasü mesüra asemüsü agi teimba kümogo.

Yimti nung aliba pastor temi iba Festival ajanga tanela aika anidentsü imlar.

## Joko Pakistan nung Khristan tanurtemi Islam yimsü indang mazüngtsü

**January 28, 2024:** Pakistan nung sorkari school tem nung Muslim nung masüba school tanurtem nem Islam yimsü indang mezüngdaksütsü telemtetba agiogo, ta International Christian Concern (ICC)-i metetdaksü.

Tan hopta tetenzüklen Pakistan nung Ministry of Federal Education & Professional Training-i sangdong ka ajanga, 2024-25 kümsük atema school tem asoshi curriculum tasen ka benoktsü, aser Khristan tanurtem nem Islam yimsü indang mezüngdaksütsü, ta metetdaksü.

Joko class 1 nungi class 12 tashi nung azünger kaketshirtem nem school nung peipei yimsü indang züngdaksütsü, ta kasa sangdong ajanga metetdaksü.

Pakistan nung Khristantem densema minorities yimsü temeden anema inyaker, ajisüaka tang school tem nung Khristantem nem Islam yimsü tem indang mezüngdaksütsü lemtetba ya linük nung yimsü temeden tera anguba ama züngshir.

Pakistan nung Tsüngrem mezüngmeshiba ozüing kübok Khristantem nem tai tonglokja apuba sülen tepuokdak ayuba, loktii Khristantem dak azükba, Muslim nung den kangshia kibong kümdaksüba aser kangshia Islam yimsü dangi meyipdaksüba kanga bulua ataloker.

Joko Pakistan nung aliba school tem nung Khristan tanurtem nem Laishiba tesayuba, Yisu Khrista taküm otsü aser Pa tesayubatem,

Arogo puti otsü aser Khristan lenirtem indang züngdaksütsü atema curriculum renemogo.

Khristan tanurtemisa school tem nung linük nung Khristan yimsü, Toma-i tenzükba mapatem aser South Asia nung pai tenzükba wadang inyakba indang azüngtsü.

Khristan tanurtemisa Shahbaz Bhatti ama Khristan tamangtir taküm otsü aser 2011 küm tepsetba Pakistan Minorities Minister nung otsü azüngtsü. Minister-i Pakistan nung Khristantem reshikangshiba anema jembiba sülen kari pa tepseta liasü.

Pakistan nung aliba school tem nung curriculum tasenba ajanga Muslim nung kaketshirtem, tesayurtem aser ketdangsertemia Yisu Khrista metettsü imlar, ta ICC-i metetdaksü.

## ANOGO ABEN TSÜNGREM DEN

### Meshitettsü aser Yok

*Ochi nung parnok meshitetjang: Ne O ochi lir. Nai kechi koda alimai ni yok, yamaji Nia parnok alimai yoker. Yohan 17:17-18.*

Tsüngremi teti na meyokdang tama meshitettsür. Tebui nütsüing tera ana shimtet aser temeshi ochi, Pa jabaso ajanga meshitettsü. Parnok Yisu den sendaktepa ali nung ochi agi (Yn. 14:6) nütsüingtemi ochi ajanga aser osangtajung sayutsüngitsü asoshi renemtsü. Yisui parnok tejangraba jazük (challenge) (Luke 9:46-48), parnok tamang ilaba indang ashi (Matt. 17:19-20), Satan arutsü (Matt. 16:23), aser parnok asükümba aitsü (Matt. 26:33-35). Kodang Yisui parnok renemtsüba atema alimaji aki ama malitsü saka melenshidaksütsü ain agütsür Pai parnok alimai yok. Temeneni Tsüngrem tsüngdang na tamakitsü kümdaksür ta Satani puatsü akok. Tiyazü tulu nungi ibaji tiyazü aruba asütsü. Nai temenen menali Tashioktsübai "Nai tamakok nguogo. Na tang joko Tsüngrem tsüngdang takidak maka" ta ashitsü. Iba yagi Khristan ka dangi tamakokji tali shisanga aser tali teyimla makaba kümdaksütsü. Aji saka, Tsüngrem tanela ka nüji kümdaksüba kecha dena medemdangtsü makok. Kodang Tsüngremer nüburi Tsüngremer ochibaji Tsüngrem mulungba nung ayutsü mulungtetdir, idangji Tsüngrem ainji mezüing nütsüingtem nem agütsüba ama parnok ajanga kasa yoktsü.

Ochibai na nüji kümdaksütsü. Ochiji "Asenoki asen temenen nangzükra, asenok dang asen temenen adoktsü aser memeshiba ajak nungi asenok merükdaksütsü, Pa temulung lemtetba aser ochi lir" (1 Yn. 1:9), aser asenok Tsüngrem asoshi alitsü agizüker.

## Ukraine nung rara tenzükba sülen Khristantemi 100 ben sarasademtsüogo

**January 28, 2024:** Ukraine nung rara tenzükba sülen alima tesem balala nung yimjung atema inyakba Khristan organisation aikati longjemmer atema sarasademja arudar, aser January 26, 2024 nü tashi nung parnoki 100 ben sarasademtsüogo.

2022 küm February ita nungi tenzükba Europe, Latin America, USA aser Palestine densema alima tesem balala nungi Khristantemi hopta shia Zoom ajanga Ukraine nung yimjung atema sarasademja arudar aser tang tashi nung parnoki minute 3,000 dak tema sarasademtsüogo.

Fellowship of Reconciliation, Cymdeithus Y Cymod, Methodist Peace Fellowship aser pan-European Church & Peace network-i ayongzükba sarasadem nungji ajaki shilem agitettsü akok. Sarasadem sentong nung o jembirtemi Orthodox tsütsülen nungi yimjung tangatetba indang jembiba den külemi rara ajanga alima tzü-mopung nung kongshiba, Palestine nung tatalokbatem aser teraksa aliba linüktem asüngsashitsü atema jembiba arudar.

Fellowship of Reconciliation nung Director, John Cooper-i, "Onoki Khristan telok ka ama

temeden aser meraratsü indang Khristan tangatetbatem wazüka ayur. Iba rara tenzükba hopta nungsa onoki sarasademtsü nungdak, ta apiteta liasü," ta metetdaksü.

"Iba (rara) ya onok tangatetba atema taoksatsüka lir. Onoki longjema sarasademer. Nisung 100 dak temai sarasademtsü nungdak, ta apiteta liasü," ta pai ashi.

Iba mapang nungjagi tenziuka Hokolbar shia aonung 7:30 ako nungi Zoom ajanga ozü teloki Ukraine nung yimjung atema sarasademja arudar, ta pai ashi.

"Fellowship ka ama tangar den-a longjemtsü nungdak aser kati ka yaritsüji tongtibang. Ajisüaka rara aser yimjung atema Tsüngrem den sendakteptsüji tongtibang," ta pai ashi.

"Mapang shia longjemmer yimjung atema sarasadema ajanga onok mapa taküm lidaksür. Kodang rara tenzükdir onoki kanga sasar. Tanela nung aintsü aser alima tesem balala nung fellowships longjemtsü atema sarasadema ya hadir ka ama lir," ta paisa shisem.

Nai Ukraine nung yimjung atema sarasademtsütsü atema register asütsü akok aser sarasadema booklet ji www.for.org.uk/ukraine nung download asütsü akok.

AO OSHI ANGAZÜKDAK: TANÜ ANGAZÜKTSÜBA OJANG



Shisang

(adv) balaka, jangjangjar (distinct)

\* Merenbai inyakba mapa agi par lokti shisang.

Shisangshisanger

(adv) tangar dang nungi balaka ( distinctively)

\* Tsüngrem metetba lanurtemji shisangshisanger asütsü.

OLONG PAITEP # 6681

Grid for OLONG PAITEP # 6681 with numbers 1-16 and shaded cells.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6680 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer, 13. Sen,
15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi, 8. Lah,
9. Jangkok, 12. Akok, 14. Nashi, 16. Sür.

NAI-A YA METETTER MA

AUSTRALIAN OPEN WOMEN SINGLE WINNER & RUNNERS UP 2010 NUNGI 2024 TASHI YAMAI :

Table with columns for Year, Winner, and Runners up, listing tennis players from 2014 to 2024.

Manipur nungi shikarir ka hire süa Kaziranga nung güntok 2 khaset

Guwahati, January 27, 2024

(Agencies): Taoba hopta Kaziranga National Park and Project Tiger (KNPTR), Assam nung güntok ana tepsettsü atema Manipur nungi shikarir ka hire asü.

January 21, 2024 nü Bokakhat police-i shikarir ka apuba sülen iba osang ya meteta aküm.

Police-i apuba nisungji Jogu Pegu (35) ta jangjaogo aser Golaghat district kübok Borbali Gaon nung alir.

Jogu Pegu ya okadaki anir ao aser pa anogo tenetnü police ket nung ayutsü temelaba agütsüogo.

Shikarir telok jagi National Park nung güntok ana khaset. January 22 nü Kaziranga National Park indang Agaratoli Forest Range anasa güntok tetsü tasümang angu.

Maneni, January 26 nü Mohmara Forest Camp anasa tanabuba güntok tasümang angu.

Manipur nung shikarir ka den ano shikarir ana- Haren Kaman aser Robin Pegu na jenshia senzüdar.

"Manipur nungi shikarirji nisung troki hire asü aser Borbali yimtsüngi anir aru. Pa ya Manipur kübok Senapati district nung alir aser January 15 nü Churachandpur-i aru. Iba sülen pa Aizawl atongba sülen Silchar-i aru aser January 17 nü Dimapur atong" ta Golaghat district superintendent of police Rajen Singh-i ashi.

Robin Pegu ta ser nisung kati Dimapur nungi pa anir ao aser January 19 nü Dergaon atong. January 20 nü [a Kamargaon tonga aru, ta Singh-i ashi.

Police-i iba nisung aputsü atema tesem aika mita ao saka tang tashi pa ano mapu lir.

"Pa Jagu Pegu'er kidang anenzük. Tenaprong January 20 nü motorcycle ka nung mener Aphala Gaon-i ao. Tenati Haren Kaman'er kidang bike ji ayu aser Kaziranga National Park

telungi ai" ta paisa metetdaksü.

"Tenati park telung nung AK-47 ajanga güntok ana khaset. January 21 anepdang 5:00 ako nung tenati yangkhu ka bener Jogu Pegu'er ki tonga aru. Robin Pegu-i meina shikarirji Dergaon nungi bus gari ajanga Dimapur-i ao" ta SP Singh-isa metetdaksü.

"Yimdaklirtem dang nungi Haren Kaman ket nung AK-47 rifle ka aliba osang angashio. Iba ya amshia güntok ana tepset. Onoki Jogu Pegu'er kidang nungi AK-47 Rifle den magazine aser injangtem ngutetogo" ta paisa ashi.

Tesüiba nung Karbi Anglong police-ia güntok tepsetba ken o ka nung Robin Pegu pua liasü.

"Manipur nungi shikariri güntok khaset aser Jagu Pegu-i pu ka agi tezü alanzük. January 26 nü Mohmara Forest Camp anasa güntok tasümang tanabuba angu" ta Singh-isa ashi.

Mallikarjun Kharge-i Amit Shah dangi Manipur atema shidi zülü

Imphal, January 27, 2024

(Agencies): Congress president Mallikarjun Kharge-i Union Home Minister Amit Shah dangi shidi ka nung Manipur Pradesh Congress Committee (MPCC) president Keisham Meghachandra dak teka sangshiba osang metetdaksüogo.

January 24 nü Kangla Fort nung senden ka amendang iba ya atalok.

January 24, 2024 nü Kangla Fort nung senden ka amendang Meghachandra dak teka sangshi.

"January 24, 2024 nü Kangla Fort nung Ministers/MPs/ MLAs senden ka ayongzük. Iba tesem ya Central aser State Security Forces ajanga

akangakanga anüker. Telungpur telok kati senden nung adenertem tashiyim agi amokbang. Ibaji dang masü saka senden nung Manipur Pradesh Congress Committee president aser Wangkhem MLA Keisham Meghachandra dak teka sangshi aser reshikangshi" ta Kharge-i Union Home Minister dangi shidi zülü.

Tang tashi nung Manipur Chief Minister aser Home Ministry ajanga iba atema mapa kecha meinyak lir ta pai ashi.

"Central & Security forces aser intelligence personnel liaka iba ya atalok. Prime Minister-i Manipur atema ola madokba ya maaksü lir" ta Kharge-i ashi.

"Item inyakyim ajanga Manipur nung administration

maliba sayur. Prime Minister-i ola madokba ya Manipur nung alir nem temeten magütsüba lir. Sorkartem melener saka temzüng mapa inyakertemi democratic maparen aser inyakyim kümzüka aser wazüka ayutsüla" ta Kharge-i ashi.

January 24 nü Meitei civil society organisation Arambai Tenggol (AT)-i Kangla nung senden ka ayongzük. Idangji Meitei MLA 36 aser MP 2 adenshia state kümzüka ayutsü tezüngzüktep agi.

Ruling BJP aser Opposition Congress nungi MLA temi state kümzüka ayutsü aser telongjem atema inyaktsü nangzüktep. Iba sentong nung Chief Minister N. Biren Singh maden saka pai tatsüka lir document nung sign asü.

RSS tanishir Mohan Bhagwat-i Dibrugarh sentong nung aden

Guwahati, January 28, 2024

(Agencies): Rashtriya Swayamsevak Sangh (RSS) tanishir Mohan Bhagwat-i Assam nung tanü sentong ka nung denogo.

Deobarnü Dibrugarh nung 8th International Conference

and Gathering of Elders nung pai shilem agi.

Iba sentong ya Shiksha Valley School, Dibrugarh nung International Centre for Cultural Studies ajanga ayongzük. Iba sentong ajanga alemli sobaliba aser

inyaksangshi nungi tamangba lennirtem aser teintet rogotem adenshidaksür.

ICCS ya non-political, non-religious aser non-profit socio-cultural forum ka lir aser USA nung headquarters lir.



Tengnoupal district nung Indo-Myanmar arrtsü anasa aliba Moreh jila nung kaketshirtemi lungkak aitba sentong ka agiba angur. Honibarnü Moreh nung kaketshirtemi school lapoktsü takhangba agüja lungkak ait.



Palestine nungertem angati chiyongtsü atema tarensena ataba noksa nung angur. Europe nung aliba linük troki U.N. Refugee Agency for Palestinians (UNRWA) atema senotsü agüja aliba Honibarnü sotogo. October 7 nü Hamas puri Israel amakaba nung UNRWA staff kar densema liasü ta Israe-i ashiba sülen parnokki iba jenjang agia liasü.

### Iran-i satellites asem takok ngua yokogo

**Tehran, Aenjeti/January 28 (Agencies):** Ministry of Defence aser Armed Forces Logistics-i yangluba carrier rocket amshia Iran-i satellite asem kanga takok ngua yokogo, ta state media sangdong ka ajanga metetdaksü.

Iba alizüing tongtetba ajanga Tehran indang ballistic missile programme tashi taiba akümtsü, koba anüolen aliba linüktemi arendaka bilemer.

Satellite tem ya Deobarnü minimum orb, 450km (280 miles) tashi yokogo. Satellite tem rongnung ka seret 32 (71 pounds) liasü aser tanungba ana ya nano-satellite liasü, koba seret 10 dang nungi tejmba lir. Satellite asem ya Simorgh (Phoenix) satellite carrier rocket amshia yokogo.

Nano-satellite ana ya Kayhan-2 aser Hatef-1 ta jatsüogo aser item ya narrowband communication aser geopositioning technology tendangtsü atema amshitsü, ta state media-isa metetdaksü.

Satellite tuluba nungia ya Mahda lir aser iba ya Iranian Space Agency-i yangluba lir. Iba ya anüinglaki ku balala bener yokba mapang Simorgh rocket indang accuracy tendangtsü nükjidong nung yangluogo. Simorgh rocket ya taoba mapang aiben tamakok nguogo.

Rocket yokba indang video Associated Press news agency-

i asadangogo aser iba ajanga satellite ya Iran kübok Semnan province nung amenoka aliba Imam Khomeini Space Center nungi yok ta jangjaogo.

Israel aser Hamas na Gaza Strip nung maneni raraba ajanga Middle East ajunga nung tensa mejungi küma rara ya tesem balala prokshia aotsü ta tsübutepa aliba mapang tang Iran-i Satellite tem yokogo.

Yemen, Syria, Iraq aser Lebanon nung Iran den sendaktepa aliba teloktemi Palestine pusema US aser Israel nunger tamendakdak maka arudar.

Israel-i Gaza amak tenzüker ita pezü jungnüa aoba mapang Palestine nunger 26,000 dak tema tepsetogo.

Iba ita tetenzüklen Iran-i, parnok indang Sorayya satellite yokogo, koba linük indang military Revolutionary Guards-i yangluba rocket ka ajanga yoka liasü aser Europe nung aliba linüktemi iba ya long-range ballistic missiles tem yanglutsü atema Iran-i amshitsü ta bilemer.

Iran-i iba taitsüba ya Honibarnü magizük aser ashiba agi, aerospace wadang nung yimjung nung technology renloka aotsü asoshi parnok temeden lir.

Kasa mapang nung US intelligence community's 2023 worldwide threat assessment-i

ashiba agi, satellite launch vehicles yangluba ajanga Iran ya missile tem yanglutsü atema jenjang ka anasabai odaktsür aser Simorgh ya dual-use rocket asütsü akok ta shiogo.

Taoba tir Hassan Rouhani kübok Iran-i anüolen aliba linüktem den mangatettep aliba süngjemdaktsütsü atema parnok indang space programme sota ata ajisüaka tir Ebrahim Raisi lenisüba nung iba sentong ya tejakdangi bener odar.

United States-i taoba mapang, Iran-i satellite yokba ya UN Security Council bangzüing anema lir ta shia Tehran ang nuclear weapons yoktetsüsa ballistic missile tem dak sendakba nung jenjang kecha magitsü ayongzükgogo.

Iran indang ballistic missile programme dak sendakba nung UN-i tenokdangba agütsür aliba taoba küm October ita tembangogo.

US-i 2018 küm nuclear deal nungi atsüingba sülen Iran-i parnok indang uranium enrichment ya weapons-grade jungnüa ajungketogo, ajisüaka US intelligence agencies aser tanga lokti tentetemi ashiba agi, Tehran-i nuclear hadir yanglutsü atemabo ano jenjang magi lir. Tehran-i ashiba agi parnok indang nuclear programme ya Civilian atema amshitsü asoshi lir.

### MENUNGRA BILEMTETER

Asür NINGSHITEMJEN CHANGKIRI



10.03.1983 - 29.01.2023


Mapang ka nungbo ki bushia arutsü amai, aser ano akümlir rongnung densema ali amai yongyaseta ataa liasü, saka ya asangsang, Temjen Kibuba dangi teti anisungzükdaki orr onok den medensem küm ka ajunger. Kanga menungrar neh.

-Temeim Kinungertem.

### ALI AYOKER

AT AOYIMKUM

Rs. 250 per sq. feet  
Two minutes walk from  
Futsal ground, Indisen  
Contact: 9856 278136



### North Korea-i ano cruise missile aika tendangogo



**Seoul, Aenjeti/January 28**

**(Agencies):** North Korea-i maneni linük anütoklen tsüküm nungi cruise missile ishika khaketa yokogo, ta South Korean military ketdangsurtemi metetdaksü. North-i tawa hadir balala kanga atonga tendanga arudar aser iba ajanga United States, South Korea aser Japan-i parnok aitsüogo.

North-i Bodhbarnü strategic cruise missile "Pulhwasal-3-31" tendangba sülen tang item missile tem tendangogo. Pyongyang-i ashiba agi, "Pulhwasal-3-31" yagi nuclear warhead-a bentetsü.

South Korea indang Joint Chiefs of Staff (JCS)-i Deobarnü sangdong ka ajanga ashiba agi, North Korea indang Sinpo rongnendak anasa tzüyim nung missile aika khaketa yokba parnokki tendangtetogo. Iba rongnendak Pyongyang-i missile-akhaba submarine tem densema naval assets tem yanglur.

"Surveillance aser vigilance tashiitshiba mapang ka nung onok military-i North Korea nung inyakyim tasentem meita atatsü atema United States den sendaktepa inyaksangshidar," ta JCS-i ashi. Pyongyang-i hopta ishika tsüingda hadirtem aika tendanga


arudar, kong "underwater nuclear weapon system" ka solid-fuelled hypersonic ballistic missile ka tendangba densema lir.

UN-i tenokdangba agütsür aliba kübok cruise missile tendangtsü atema North Korea nem tenokdangba agütsür mali, ajisüaka ballistic technology tem atemabo tenokdangba agütsür lir. Tang cruise missile tem tendangba ajanga Washington, Seoul aser Tokyo den tensa tamajungba kümaktsütsü.

Tenokdangba balala agütsür liaka Kim-i, linük indang illicit ballistic missile programme tejakdangi bener aotsü atema jenjang tali agidar, koba ken o asadangertemi ashiba agi Russia den tesendaktep nung inyakdar.

North Korean lenir Kim Jong Un-i iba ita tetenzüklen ashiba agi, South Korea ya par linük asoshi tsükchir tongtiba aser Korean Peninsula longjemtsü atema jembishinüa aruba ya joko kecha takoktsü masü.

Kasa mapang nung US, South Korea aser Japan-i Pyongyang nem telangzüba agüja joint military exercise aika ayongzüka agia arudar, koba Kim-i ashiba agi, parnok amaktsü atema renemshiba ka lir.



Phnom Penh, Jan. 28 : Cambodian Ministry of National Defense, nung Logistics and Finance General Department Lt. Gen. Moeung Ponlork-i (teyong), January 27 nü Phnom Penh, Cambodia nung China nunger military doctor pezü nem medal agütsüba noksa nung angur. Preah Ket Mealea Hospital nung medical jenjang tajungba küma ajungketba nung tongtibang shilem agiba atema Cambodia-i China nunger military doctor pezü nem tetushi agüja liasü.

## Australian Open: Sinner-i tebur kija asaya kokogo; Wei o Elise nati tetsür tarep asaya akok



**Aenjeti/January 28, 2024 (Agencies):** Deobarnü set ana Russia nunger asayar Australia Open tebur kija asaya final nung World No. 4 Jannik Sinner-i set pongu kanga toktepa asayaba sülen World No. 3 Daniil Medvedev kokogo.

Iba asaya ya Sinner-i 3-6, 3-6, 6-4, 6-4, 6-3 agi koka tang mezüngbuba Grand Slam title ka benogo. Tena tsüingda ghonda asem sür minute 43 asaya liasü.

Küm 13 tsüingda tang agi tanaben buba-ang Novak Djokovic, Roger Federer, aser Rafael Nadal nunger dak alak tangar asayar kati Australian Open tebur kija asaya kokogo. 2014 küm Stanislas Wawrinka-i iba asayamung koka liasü.

Asaya nung mezüngbuba set ana Russia nunger asayar Medvedev-i akok, ajisüaka Sinner-i asendenshir kanga meranga asaya tanungba set asemprongla pai koka taküm iba asayamung tebur kija asaya kokogo.

Sinner-i semifinal nung Novak Djokovic koka final tongteta liasü. Novak Grand Slam 25buba akoktsü atema taküm AO nung asaya liasü saka pa Sinner-i nokdang.

Kasa asayamung tetsür tarep asaya Taiwan tsür Hsieh Su-Wei aser Belgium tsür Elise Mertens nati kokogo.

Deobarnü final asaya nung tenati Latvian-Ukrainian tarep Jelena Ostapenko and Lyudmyla Kichenok na 6-1, 7-

5 agi koka liasü.

2021 küm Wimbledon nung takok tajung anguba sülen Hsieh Su-Wei aser Elise Mertens nati tang agi tanabenbuba Grand Slam ka kokogo.

Kasa mapang nung arishi küm 38 tain Su-Wei ya Lisa Raymond sülen Grand Slam tarep asaya ka akokba asayar tantsütila kümogo.

Hsieh shiba tawa kija asaya nung anenogo, lai la indang tarep asaya career nung ano title ka bendenlokogo. Tatsür tarep asaya tenetben tashi koker aliba nung ano lai tang agi tanabenbuba Australian Open kokogo aser iba den lai Hokolbarnü tarep temeyoktep asaya final-a koka liasü.

## Season tembangba sülen Xavi-i Barca toktsütsü



**Aenjeti/January 28, 2024 (Agencies):** Barcelona manager Xavi-i ashiba agi, pa season tembangba coach mapa toktsütsü.

Toba mapang Barcelona aser Spain midfielder yagi Qatari club Al Sadd toktsüba sülen 2021 küm November ita Barca coach mapa agizüka liasü.

Coach mapa agizüker mezüngbuba küm pa lenisüba nung Barca puri Spanish title aben ajisüaka Honibarnü kidang goal 5-3 agi Villarreal makokba sülen parnok La Liga nung temaba jenjang nung aliba Real Madrid dang nungi point 10 agi tejmba lir.

"Ni club atema bendanga inyakba nisung ka lir. Ni kü dang nungia club taoba ta züingshio. Ni akokba tashi club atema inyakogo," ta Xavi-i ashi.

"Ni maneni fan tem nema dangdaksütsü atema inyaktsü."

Arishi küm 44 tain shibai Barcelona nungi asayaba mapang takok marnok 25 tashi koka liasü, pa club den tenanzüktepba yangluba ano küm ka anunga liaka June 30 nü mapa nungi anentsü.

2010 küm World Cup koker aliba asayar yagi ashiba agi, Bracelona tir Joan Laporta, vice-president Rafa Yuste, aser sporting director Deco nunger den sensaksemba sülen pai iba telemtetba agiogo.

Xavi-i iba ita Spanish Super Cup nung Real Madrid goal 4-1 agi makokba sülen asayartemi pa dak tamang makara pa ku oshia bener aotsü ta shir liasü.

Iba sülen Barca puri asaya ana atonga akok, ajisüaka Bodhbarnü Copa del Rey nung parnoki Athletic Bilbao makok

aser iba sülen ano Villarreal mekoki talangka asepzüka alu.

Xavi-i ashiba agi, iba mapang yagi pa kanga belemdaksüogo aser pa mental health atema ainshitsü mapang tongogo.

"Barcelona nung nai na mezüngshir aser nü dak mebenshitsü yimya benshir ama bilemer. Aji club inyakim," ta pai ashi.

"Mental health atema-a kanga tasak. Ni kanga positive nisung ka, saka battery tajemba dang akümer, aser idaki maneni inyaktsü kecha nüngdak madoker ama bilemer," ta Zavi-i ashi.

Xavi-isa, pai club toktsüba sangdongba ajanga season tanungba atema asayatsü asoshi tensa tajungba akümtsü, kong Napoli den Champions League last-16 asayatsü densema lir.

"Champions League kokaka ni kü telemtetba memelenshitsü. Ni asayartem dang asüng ashitsü. Ni sen agi masü saka temulungja agi anir. Club atema aji tajungba asütsü. Ni teblemetsü ka mesüner aser ken o bentettsür ka süner aser tang nungi June 1 nü tashi nung ni ken o tem bentettsütsü imlar," ta paisa shisem.

## ICC-i Sri Lanka Cricket nem tenokdangba agütsür aliba aginogo

**Aenjeti/January 28, 2023 (Agencies):** International Cricket Council (ICC)-i Sri Lanka Cricket (SLC) nem tenokdangba agütsür aliba Deobarnü agintsüogo.

Cricket asaya achaayangba lokti tentet yagi taoba küm November 10 nü SLC nem tenokdangba agüja liasü. Cricket asaya inyakim nung yimden yimüsüba mezübelangba atema SLC nem tenokdangba agütsü aser iba sülen Sri Lanka nung U-19 World Cup asayatsü aliba South Africa-i belener ao.

Tenokdangba agütsüba dak sendakba nung SLC-i November 21 nü ICC nem temepeshiba ka agütsü. Taküm January tetenzüklen ICC CEO Jeff Allardice-i linük tir Ranil Wickremesinghe aser sports minister Harin Fernando aser board den sensaksemba liasü aser tenokdangba agütsür aliba agintsü imla liasü.

"ICC züingsem ka ama inyakim shitak benoka minyakba aser talisa sorkar nem

mejushidaksüi Sri Lanka nung cricket asaya governance, regulation aser administration ajak achaayangtsü nüngdaka aliba sülen manidakba atema November ita SLC nem tenokdangba agütsü. Tenokdangba agütsüba sülen Board-i tensa asadanga aruogo aser SLC inyakim nung kecha aibelen mali ta reprangtetogo," ta ICC-i ashi.

Taoba küm November ita Fernando melensang Roshan Ranasinghe-i, SLC board ajanga melenüa liasü aser taoba captain Arjuna Ranatunga-i tekolak sür interim committee ka shima liasü.

Ajisüaka iba inyakim ya linük SC-i sota ata liasü.

Iba sülen ICC-i SLC nem tenokdangba agütsü, koba Sri Lanka nunger ketdangsur kati pusema liasü.

Metepmesü adokba sülen Ranasinghe ya pa mapa nungi agin, aser iba ajanga taruba ICC board senden nung tenokdangba agütsür aliba agintsü timla agütsü.

## La Liga: Real Madrid temaba jenjangi tuogo



Kroos-i corner metsüba ball ka kanga junga tongokja parnoki asaya akok.

Iba asaya nung Madrid pur asayartem rongnungi goal timtiba idaktsür alisang Jude Bellingham masaya, shiba suspend sür liasü aser Ancelotti-i temelenshi kar bener aru kong midfield nung Dani Ceballos aniokba densema lir.

Asaya mezüngbuba shilem nung telok anaprongla goal idaktsütsü asoshi maongka aika mongutetaka Las Palmas' nungi Sergi Cardona-i goal idaktsütsü kanga amokmerena asaya aser Ceballos-i pa challenge asüba sülen penalty ka tera agi dang memena.

Las Palmas shirnok taoba Barcelona reserves coach Francisco Garcia Pimienta lenisüba nung asayadar, parnoki kanga atasa asyago. Ajisüaka asaya tanabuba shilem nung Munoz broke-i counter-attack asüba mapang par team atema goal ka idaktsü.

Iba sülen Vinicius-i minute 65buba nung Madrid atema goal ka idaktsü. Pai iba masüdag goal ka idaktsütsü asoshi maongka anguba magiteti liasü. Iba sülen Ancelotti-i tali attack süa asayatsü atema Arda Guler yok aser iba sülen asaya koktsüsang Tchouameni yoka liasü.

**Aenjeti/January 28, 2024 (Agencies):** Honibarnü Real Madrid aser Las Palmas na asayaba mapang Aurelien Tchouameni-i asaya tatemi goal ka idaktsüba sülen Real puri asaya goal 2-1 agi kokogo aser La Liga nung parnok temaba jenjangi tuogo.

Iba asaya akokba sülen Carlo Ancelotti-i aniba team ya Girona dang nungi point ana agi timba kümogo. Team anaprongla ya tang tashi nung asaya 21 asayar lir.

Asaya mezüngbuba shilem goal kaka danga magütsüteni tembangba sülen tanabuba shilem nung Girona nungi asayar Javier Munoz-i goal ka idakja parnok tejakdang aküm. Ajisüaka mapang tatsüka lir Vinicius Junior-i Real atema goal ka idakja goal kasasa aküm.

Telok ana kanga toktepa asayaba sülen asaya atemtsü minute asem lia Ancelotti-i Tchouameni yok aser pai Toni

**BILEMDANGANG**

"Kong telungjem lir, idakji tashi lir."